

## Kapiya Sën Paulus Kevu Vu Kerisi-yi-alam Vu Pilipi

<sup>1</sup> Kerisi Yesu yi hur sa Paulus geTimoti, balu kevu kapiya sënë yök vu ham Pilipi pin sën Kerisi Yesu yi alam ham lo, ving ggev sën denegin dub los alam sën denelok vu ham lo.

<sup>2</sup> Hil Amad Anutu luho Mehöböp Yesu Kerisi degevonḡ semusën vu ham bedegevonḡ ham ayomin gëp revuh.

### *Paulus Kwa Vesa Vu Anutu*

<sup>3</sup> Sën sa kwag nevo ham lo, og sa najom rak vu sa Anutu los kwag vesa in ham rot.

<sup>4</sup> Lob sën sa neketag vu Anutu bë doḡ vu ham lo, og sa neketag los ahëḡ nivesa in ham.

<sup>5</sup> Sa kwag vesa in ham nelok vu sa gesa nanër Bengö Nivesa rangah. Vu nyëdahis rot beverup gwëbeng.

<sup>6</sup> Lob serak ni ggovek bë Anutu yö vong huk nivesa loḡ ham ayomin vu nyë dahis, lob yö rëḡ medo gevonḡ rot begovek na doḡ buk sën Kerisi Yesu duk nom lo.

<sup>7</sup> Log sën sa kwag vesa in ham lo, og sagaḡ yoh vu. In buk vahi og sa nado karabus, log buk vahi og sa nehevong huk in bë gaḡu Bengö Nivesa balam degevonḡ geving niwëëḡ. Lob nelok buk saga pin, og ham kwamin nevo sa, om huk sën sa nehevong banon nerak menesemu alam vahi lo, og yik ham nevong huk sagi ving behil kwad vesa loḡ ti, om sën sa kwag nevo ham yoh vu buk pin.

<sup>8</sup> Senër yönön neggëp Anutu mala bë sayog nepe-bip sa in bë senök galë ham pin, in sahëg neving ham nebë sën Kerisi Yesu ahë neving ham lo.

<sup>9</sup> Lob sa najom raḵ in ham bë ham ahëmin geving ham niwëëk rot noh vu buk pin bena meböpata jak. Gesa najom raḵ ving bë ham natök vu kwa nivesa rot beham seggi ngaa pin,

<sup>10</sup> in ham jak ni nabë nivesa ma nipaya. Nabë saga in ham natu alam yohvu gengaa nipaya su gëp vu ham rë, rot bena berup dok buk sën Kerisi duk nom lo.

<sup>11</sup> Lob ngaa niröp sën Yesu Kerisi yoh vu bë gevong banon jak dok hil ayod lo napup ham ayomin rot. In sënë rëḵ geḵo Anutu arë jak nabë mehö niwëëk los arë böpata.

### *Paulus Ya Ḷarabus Lob Sënë Loḵ Vu Bengö Nivesa*

<sup>12</sup> Arig lo, sa bë ham jak ni nabë ngaa sën töḵ vu sa agi, og su ggërin Bengö Nivesa rë. Gaḵ nelok vu meneya rot.

<sup>13</sup> In alam-begö-yi pin sën denegin mehö-los-bengö Sisar\* yi beggang lo, galam vahi pin, og derak sa nig ggovek ya bë seyam ḵarabus in Kerisi yi hur sa.

<sup>14</sup> Lob arig lo ngahisekë sën ayoj neya timu vu Mehöböp lo kwaj nevo sa bë seyam ḵarabus, lob ayoj niwëëk raḵ in sënë, lob devuu ggönengsën ya genij wëëk raḵ medenër Anutu yi gagek rangah.

<sup>15</sup> Yönön, sir vahi og ahëj nipaya in sarëg ya, lob denevong in bë dedahun sa, om sën denenër Kerisi yi gagek rangah raḵ degwa sënë, rëḵ sir vahi og ahëj nivesa medenenër Kerisi arë los ayoj niröp.

16 Alam sënë derak ni bë sa nado sënë in bë sa gadu Bengö Nivesa, om sën ahěj neving sa medenenër gagek rangah.

17 Rëk sir vahi og denenër Yesu yi gagek in bë degeko yö arěj jak. Gak ayoj su niröp rë. Yönon, denevong in bë debo maggin la dok na geving vu sa dok karabus.

18 Rëk yik sagak ngaa meris. Bë denanër los ayoj niröp, ma su denanër los ayoj niröp rë, og yik ggovek. Denenër Kerisi yi gagek rangah, om sa kwag vesa in sënë, gesëk kwag vesa rot.

19 In serak ni bë ngaa sënë rëk dok vu sa besëk medo nivesa, in serak ni ggovek ya bë ham nejom rak yoh vu buk in bë dok vu sa, lob Yesu Kerisi yi Anon Vabuung gadu sa.

20 Sa navo kwag in ngaa timu, gesa hevong ving bë rëk anon jak nabë: Sa su rëk nig namum in ngaa sën sa nehevong ggëp dob lo ti rë. Gak nabë sa nadiik, ma nabë sa medo vesag, og sa bë gevong ngaa pin sënë los nig wëek in geko Kerisi arë jak. Vu pehi sënë, genoh vu buk pin.

21 In sa og sa kwag nevo nebë sënë: Nabë sa medo vesag og nivesa, in setu Kerisi-yi-alam ti ggovek ya. Gak nabë sa nadiik og nivesa rot, in sëk medo geving Kerisi yönon.

22 Rëk mu nabë sengo nahën medo vesag vu dob, og sëk gevong huk vahi geving banon jak, om mak sëk gevong nabë va? Sa dugin!

23 Sa kwag luu luu in sënë. Sa bë nadiik bena medo geving Kerisi in sënëk nivesa rot.

24 Gak mu nabë sengo nahën nemedo dob, og yik nivesa rot, in mëm sëk medo medok vu ham rë.

25 Om sa kwag neya timu meserak ni bë mak

sëk medo vesag medok vu ham in ham gwevong geving niwëek bekwamin vesa rot.

<sup>26</sup> Nebë saga, om nabë dekevelekin sa besenök berup vu ham gökin, og ham rëk kwamin vesa in begweko Kerisi Yesu arë jak pangsen.

*Alam Pilipi Losho Paulus Degebë Dok Ti MedengisBëgö In Bengö Nivesa*

<sup>27</sup> Rëk mu ham sepa dok Kerisi yi Bengö Nivesa niröp in nabë senök galë ham, og sejak ni. Ma nabë sa gango ham bengömin mu, og yik ggovek, gesëk gango nabë ham ahëmin neving ham menare lok ti, bayomin ti, benelok vu ham menesis begö in Bengö Nivesa in bë na meniweëk jak balam degevong geving.

<sup>28</sup> Sa hevongin bë gango ham bengömin nabë ham su nehöngin alam sën denekeyëh ham gagek lo rë. Gak sa bë gango nabë ham nare niwëek. Bë ham bare niwëek nabë saga, og saga netato bë rëk malaj nama. Log netato ving bë Anutu rëk geko ham nah vu yi beham medo nivesa.

<sup>29</sup> In Anutu su vo semusën sënë vu ham bë ham ayomin na timu vu Kerisi mu rë, gak vo semusën ngwë vu ham bë kwerë maggin vahi geving in ham tu yi alam.

<sup>30</sup> Yik hil nasis begö ggëp ti in Bengö Nivesa, nebë sën ham lë gesa nehevong wirek lo, genebë sën ham ngo bë sa nahën nehevong gwëbeng agi.

## 2

*Hil Dahun Hil Gahëd Geving Arid Lo*

<sup>1</sup> Maḥ ham neko niwëek vu Kerisi? Kerisi ahë neving ham lom saga vong beham ayomin to

revuh-a? Gemak Anon Vabuung neduu hil tu alam yu timu? Gemak ham ahëmin neving mehönong gekwamin nevongin sir-a?

<sup>2</sup> Om nabë nebë saga og mëm ham sepa dok kwa timu. Ham ahëmin geving ham anon rot, beham medo jevuh ti, beham malamin sepa huk timu. Bë ham gwevong nabë saga, og ham rëk gwevong besa kwağ vesa böpata rot.

<sup>3</sup> Ham su kwamin bo ham mu beham gweko ham jak. Gak ham gurek alam vahi babuj geham kwamin bo sir nabë dekesuu ham rak ngaa nivesa.

<sup>4</sup> Geham su gwëgin ham ngo ham ngaa mu, gak ham gwëgin mehö ngwë hir ngaa geving.

*Kerisi Dahun Yi Lob Anutu Kō Arë Rak*

<sup>5</sup> Ham kwamin bo ngaa nabë sën Kerisi Yesu nevong lo.

<sup>6</sup> Anutu sogek yi,  
rëk mu su kwa nevo bë najom aggata sën luho  
Anutu neggëp ti lo ahon rë.

<sup>7</sup> Gak vuu aggata sënë ya getu mehönong rak,  
bevong ngaa nebë hur meris.

<sup>8</sup> Tu mehönong bedelë yi nebë mehönong sogek,  
rëk mëm yö dahun yi genesepa loğ Anutu aye  
rot bediik.

Yönon, diik rak kelepeko\* nebë alam nij paya.

<sup>9</sup> Om sën Anutu kō yi rak, rak yik degwa sënë,  
beko yi rak yah vavunë rot.  
Lob tung ggev ti sën kesuu ggev vahi pin lo rak  
yi.

<sup>10</sup> In nabë degengo Yesu arë,

og alam pin vu yagek gevu dob gevu dob  
gebinë  
rëk dengun lusej vu yi.

- 11 Log mehönnon pin rëk denanër rangah doḵ ayej  
nabë:  
Yesu Kerisi tu Mehöböp.  
Gedegeḵo Ama Anutu arë jaḵ nabë saga.

### *Hil Najëh Nabë Betuheng*

12 Om sa mehö lo! Ham ngo medo gwevong  
noh vu sayeg nabë sën ham nevong aga. Yönon,  
sën sa nado ving ham wirek lo og ham nevong,  
gaḵ gwëbeng sënë sengo nado adingnë, om ham  
pasang gwevong nabë saga. Anutu ḵo ham yah  
vu yi om ham ayomin na timu beham göneng in  
yi begurek babu in mëm rëk geḵo ham nah vu yi  
beham medo geving yi vu tamusën.

13 In hil arak ni bë Anutu nevong huk loḵ ham.  
Yö nevër ham kwamin, lob mëm ham nevong ngaa  
yoh vu sën ahë neving lo.

14 Log ngaa pin sën ham gwevong lo, og ham gw-  
evong los nimin yes, gaḵ ham su gwevong ayemin  
vu los gök ham in.

15 Ham gwevong nabë sënë in ngaa nipaya su  
gëp vu ham, gaḵ ham medo niröp nabë sën Anutu  
nalu ham lo. Yönon, ham nedo loḵ alam nij paya  
los alam gagek tetuhinsën vuheng, rëk mu ham rëk  
najëh jaḵ sir nabë betuheng.

16 Ham nanër gagek sën yoh vu bë gevong be-  
mehönnon demedo malaj-tumsën lo vu sir in mëm  
sa napisek in doḵ buk sën Kerisi duk nom dob lo.  
In sëḵ jaḵ ni nabë sa su nevasap sa menehevong  
huk meris rë.

<sup>17</sup> Alam Yuda denesis reggu tu seriveng, lob denekeseh wain raḵ ving, lob yik sën ham ayomin neya timu vu Kerisi lo nebë seriveng saga. Log nabë dengis sa, og yik ggovek, in sa nig kök rëḵ keseh nabë wain sën denekeseh raḵ ham seriveng lo, lob sëḵ kwag vesa geving ham.

<sup>18</sup> Om yik ham kwamin vesa geving nabë saga behil kwad vesa dok ti.

### *Timoti Yi Gagek*

<sup>19</sup> Nabë Mehöböp Yesu kwa bo, og sëḵ gevong Timoti nöḵ vu ham, loḵ mëm rëḵ nom nanër ham bengömin vu sa besa kwag vesa.

<sup>20</sup> In su sa mehö ngwë nedo balu kwamin nevo ngaa neggëp ti nebë Timoti rë. Yö kwa nevo ham rot bë dok vu ham.

<sup>21</sup> Gaḵ alam vahi pin og yö denegin yö hir ngaa gesu kwaj nevo Yesu Kerisi yi huk rë.

<sup>22</sup> Rëḵ Timoti og ham raḵ ni bë yi mehö nivesa benelok vu sa in Bengö Nivesa nebë sën hurma-hen ti nelok vu ama.

<sup>23</sup> Sa bë gevong yi nöḵ pevis vu ham, rëḵ mu sejak ngaa sën rëḵ natök vu sa lo ni namugin loḵ mëm.

<sup>24</sup> Rëḵ mu sa hevong ving bë Mehöböp rëḵ tatekin äggata gesengo rëḵ nöḵ vu ham geving.

### *Epaproditus Yi Gagek*

<sup>25</sup> Log sa kwag nevo bë maḵ sëḵ gevong hil arid Epaproditus nah vu ham gökin pevis. Wirek ham vong yi loḵ yah ham bömin beyam loḵ vu sa, balu nehevong huk loḵ ti galam desis begö vu aluu in Bengö Nivesa.

26 Rëk tum nevo kwa in ham bë nök gelë ham. Gayo maggin rot in ham ngo bë nirak.

27 Yönon, nirak böpata lob dus rak bë nadiik na. Rëk Anutu kwa vongin aluu beloḵ vu yi in bë su nadiik besayog maggin böpata rot rë.

28 Om sën sa kwaḡ nevo rot bë sa gevong yi nök pevis beham gwelë yi gökin bekwamin vesa lob mëm sa maggin rëk ahë yes jak teka geving.

29 Om ham gweḵo yi nök vu ham los kwamin vesa in Mehöböp yi hur yi. Geham gweḵo alam nabë sënë arëj jak.

30 Dus rak bë nadiik doḵ Kerisi yi huk. In ham su yoh vu bë doḵ vu sa rë, om sën loḵ yah ham bömin beneloḵ vu sa, rëk töḵ vu niraksën sënë bedus rak bë nadiik.

### 3

#### *Mehöti Sën Ayo Na Timu Vu Kerisi Lo, Og Yi Mehö Yohvu Yönon*

1 Arig lo, sa bë semu gagek sënë hus nabë ham kwamin vesa in Mehöböp. Sa nanër gagek timu sënë yoh vu buk, rëk mu sa su rëk nig tebö jak in rë, in gagek saga rëk gadu ham.

2 Ham gwegin ham in alam sën denevong huk nipaya nebë anöö bemën lo. Ham gwegin ham in alam nij paya sën denevongin bë dekepë ham lo. Geham gwegin ham in alam sën denevongin bë degerah\* ham navimin in mëm ham natu Anutu-yi-alam lo.

3 In degwa su neggëp vu ngaa saga rë, gaḵ hil sagi og Anon Vabuung neloḵ vu hil behil nehako Anutu arë rak, om hil atu yi alam soḡek. Hil su



kwad nevo navid rē, gaḵ hil napisek in Kerisi Yesu yō timu.

<sup>4</sup> Yōnon, maḵ sengo yoh vu bē kwag bo sa navig. Nabē mehō la kwaj nevo sēn derah\* navij lo bē yoh vu bē geko sir nah vu Anutu, og seyoh vu bē nanēr rot kesuu sir.

<sup>5</sup> In satag ḵo sa lob buk tu nemadvahi-bevidek-lōo lob derah\* sa navig. Saḵ Israel ti. Sa degwa vu Benyamin. Saḵ Hibru ti gesamag lu atag og Hibru ving. Log sa Parisai\* ti gesa nesepa loḵ Moses yi horek nebē sēn sir lo.

<sup>6</sup> Sa nig wēek rot bē sa gevong Anutu yi huk, om sēn wirek og sa nasis Kerisi-yi-alam rot. Rēḵ mu nabē mehōti seggi sa jaḵ Moses yi horek, og rēḵ gelē nabē sa nesepa loḵ pin los dahis.

<sup>7</sup> Lob wirek sa hekuung bē ngaa pin sēnē og ngaa bōp rot, loḵ tum sehērin sa tu Kerisi yi mehō lob seraḵ ni bē ngaa pin sēnē og yik ngaa meris.

<sup>8</sup> Sa su nanēr raḵ Yuda hir ngaa mu rē. Gaḵ seraḵ ni bē Kerisi Yesu tu sa Mehōbōp, om sēn sa nehalē ngaa vahi pin bē ngaa meris. Sa nesepa loḵ Kerisi vaha, besa hevuu ngaa vahi pin ya, besa nehalē nebē laa, gesa bē najom Kerisi ahon

<sup>9</sup> benatu yi mehō. Yōnon, Horek su yoh vu bē gevong besa natu mehō yohvu rē. Rēḵ sayog neya timu vu Kerisi, om sēn Anutu nēr sa bē sa mehō yohvu, in Anutu nenēr mehōnon bē sir alam yohvu degwa raḵ sēn ayoj neya timu vu Yesu lo.

<sup>10</sup> Sa bē sejaḵ Kerisi ni yōnon. Gesa bē gaḵo niwēek vu yi in diik gekedi raḵ yah. Sa hevongin bē gaḵo ḵerus nabē sēn ḵo lo, gesa bē sa su kwag bo sa, gaḵ sa bē dahun sa nabē sēn Kerisi dahun yi bediik lo.

11 Sa nehevong nebë sënë, in sa kwag nevo bë rëk gevong besëk kedi jak nah gëp bedub geving.

*Paulus Serög Niwëek In Bë Geko Kupek Nivesa Vu Yagek*

12 Yönon, sa su kwag nevo bë sa nehevong ngaa pin saga niröp beseyoh vu ggovek ya rë. Gak sengo nesepa lok ngaa pin sënë rot in bë sëk gako nyëvewen nivesa sën Kerisi Yesu ggoin rak in bë gevong vu sa lo.

13 Arig lo, sa su rëk gako sa jak nabë sa hako anon ggovek ya rë. Gak yik sa nanër gagek timu sënë nabë: Sa hevuu ngaa wirek hen pin ya, gesa nehevong huk niwëek in bë sa gako ngaa tamusënyi.

14 Sa nesorög niwëek in bë sa natök na telig vewen sën lo medegebë sarëg, lok mëm Anutu tahi sa mesena vavunë megako nyëvewen jak Kerisi Yesu yi huk.

15 Om hil sën Anutu nër hil nebë hil alam yohvu lo, hil pin kwad bo gagek gëp ti nabë hil gevong nabë sagi. Rëk nabë ham kwamin nevo gagek ngwë yööhu, og Anutu rëk tatekin ham kwamin.

16 Rëk mu gagek anon sën hil nesepa lok agi, og hil ngo najom ahon menapiik vu.

17 Arig lo, ham pin sepa dok sa vahag. Geham gwelë alam vahi sën denesepa lok sa lo geving nivesa, beham sepa dok he vahamin.

18 Senër vu ham beron ngahisekë ggovek ya, log gwëbeng sak nanër vu ham gökin los malag bel nabë: Alam ngahisekë denelë Kerisi paya bedenevongin bë dedahun gagek sën netatekin yi kelepeko\* lo na.

<sup>19</sup> Alam sënë malaj anon in nos los reggu lu ngaa rot bedeneko rak tu hir anutu. Denepisek in ngaa nimumsen aggagga, gekwaj nevo ngaa dob yi mu. Om alam sënë rek malaj nama gep Nyeg Nipaya.

<sup>20</sup> Gak hil og hil atu alam-yagek-yi, lob hil nehegin be Mehobop Yesu Kerisi vu yagek meduk nom begek hil nah.

<sup>21</sup> Rek gevong behil navid nipaya sënë pekwë yi bemalangeri jak nabë sen yö navi. Rek gevong nabë sënë jak niwëek sen yoh vu be getung ngaa pin degevek babu lo.

## 4

### *Paulus Nër Bë Ahëj Geving Sir Gekwaj Bo Ngaa Nivesa*

<sup>1</sup> Nebë sënë om arig lo, ham tu Mehobop yi alam om ham ngo bare niwëek. Sahëg neving ham, besa nehevongin be galë ham gökin. In sa kwag vesa in ham, geham vong be sa sok sengii yi.

<sup>2</sup> Log hong Ewodia, gehong Suntuke, melu gwengo re! Melu semu gagek in Mehobop yi hur avëh meluu.

<sup>3</sup> Log hong sen alu nehebë lok ti in huk-e! Sa naner vu hong nabë gedok vu avëh luu sënë. In wirek og alöö nalok vu he in Bengö Nivesa ving Klement losho alam vahi sen he nehevong huk timu barëj neggëp lok kapiya-mala-tumsen-yi lo.

<sup>4</sup> Ham kwamin vesa in Mehobop jak buk pin, gesak naner gökin nabë ham pasang kwamin vesa rot.

<sup>5</sup> Ham gwevong balam pin dejak ham nimir nabë ham nejom ham ahon, geham su neko ham rak re. In Mehobop yam dus rak ggovek ya.

<sup>6</sup> Om ham su newamin jak! Gak nabë ham jak vu in ngaa ti, og ham najom jak bekwetag vu Anutu in, lob ham najom jak benanër los kwamin vesa vu yi geving.

<sup>7</sup> Lok mëm Anutu rëk gevong beham ayomin gëp revuh. Alam dob-yi dugin ngaa sënë degwa besu detök rak rë, rëk mu sën ham ayomin gëp revuh lo rëk gevong beham ahëmin nivesa rot geham kwamin niröp jak in Kerisi Yesu yi alam ham.

<sup>8</sup> Arig lo, sa bë nanër gagek ti vu ham gökin nabë ham kwamin bo ngaa nabë sënë noh vu buk: Ngaa pin sën anon lo, gengaa sën niröp lo, gengaa sën neyohvu lo, gengaa pin sën nivesa lo, gengaa sën malangeri lo. Geham kwamin bo ngaa sën hil galë nabë nivesa lo los ngaa pin sën yoh vu bë hil gaço arë jak lo.

<sup>9</sup> Ngaa pinek sa tahu ham lok, lob ham ko ggovek ya, gengaa pin sën sa nanër los sa nehevong lo, og ham ngo los ham lë ggovek ya, om ham gwevong nabë saga noh vu buk. Nabë saga, lob Anutu sën nevong behil ayod neggëp revuh lo rëk medo geving ham.

### *Paulus Kwa Vesa In Alam Pilipi*

<sup>10</sup> Sa kwag vesa rot gesa napisek in ham vu Mehöböp, in ham nedo hus ading rëk gwëbeng ham kwamin vo sa belok vu sa ggökin. Yönon, ham kwamin nevo sa wirek bë doḱ vu sa, rëk aggata su neggëp in bë ham gwevong nam rë.

<sup>11</sup> Sa su bë rëk nanër nabë sa narak vu in ngaa rë. Gak wirek og sa newag nerak in ngaa sën netök vu sa lo, rëk gwëbeng og setu Yesu yi hur, lob sa nado revuh in ngaa pin.

<sup>12</sup> Sehög ngaa bë paya teka, og yik ggovek, genabë ngahisekë og yik ggovek. Log bë sega nos menajom sa ahon, ma meyip gevong sa, ma nabë senoh vu ngaa pin, ma sejaḵ vu in ngaa, og sa nehalë ngaa pin sënë bë yik neggëp ti, lob vu nyëg pin geyoh vu buk pin, og sayog sepëp.

<sup>13</sup> Mehö sën lo negadu sa, lob seyoh vu bë gevong ngaa pin jaḵ niwëëk.

<sup>14</sup> Rëḵ ham nevong nivesa, in ham nelok vu sa beham nekwerë sa maggin.

<sup>15</sup> Yönon, ham alam Pilipi, ham ngo rak ni bë wirek sa nanër Bengö Nivesa vu distrik Masedonia nyëdahis lob ggovek gesa naya rak, rëḵ alam saga la su denevengwëng ving sa bë he dok vu he vewen vewen rë. Gaḵ ham mu sën mëm ham nevong.

<sup>16</sup> In sa nado Tesalonika wirek, lob ham nelok vu sa benevong kupek vu sa, rëḵ su beron timu rë.

<sup>17</sup> Rëḵ saga su nebë sa malaḡ anonin kupek rë. Gaḵ sa hevongin bë ham gwevong huk nivesa nabë sënë in gevong beham nyëvewen böp jaḵ besemu ham.

<sup>18</sup> Lob gwëbeng og sa haḵo ngaa pin ggovek ya bengahisekë rot, beseyoh vu ggovek ya. Ham vong kupek vu sa bEaproditus ḵo yam lok ya sa nemaḡ ggovek ya. Kupek sënë vong bë seriveng sën ham nevesi bereggu nivesa verup neya vu Anutu lo. Om Anutu rëḵ gelë nivesa nabë yi seriveng, lob ahë nivesa in.

<sup>19</sup> Lob ham tu Kerisi Yesu yi alam, om sa Anutu rëḵ gegin ham nivesa in ngaa pin sën ham nerak vu in lo jaḵ ngaa nivesa vesa pin sën neggëp vu yi lo.

<sup>20</sup> Om hil gaḳo hil Amad Anutu arë jaḳ na vavunë degwata los degwata. Yönon.

*Gagek Hus*

<sup>21</sup> Sa bë nanër na vu Kerisi Yesu yi alam pin nabë sa kwaḡ nevo sir. Log hil arid lo sën denedo ving sa agi denër bë kwaj nevo ham ving.

<sup>22</sup> Yönon, Anutu-yi-alam pin denër bë kwaj nevo ham. Gesir vahi sën denevong huk ggëp mehö-los-bengö Sisar\* yi beggang lo denër niwëek bë kwaj nevo ham ving.

<sup>23</sup> Mehöböp Yesu Kerisi yi semusën nöḳ gëp geving ham ḳenumin.

**Gagek Mewis**  
**The New Testament in the Central/Mapos dialect of the**  
**Buang language of Papua New Guinea**  
**Nupela Testamen long tokples Buang Mapos long**  
**Niugini**

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 18 Apr 2025 from source files dated 31 Aug 2023

18a972db-abcc-5dc3-9031-f1d4455b33c3